

Damaun en Georgia?

In auter privel en l'Orient

DA GUIU SOBIELA-CAANITZ

■ **President Busch è in emprendist da striun. Attatgond l'Irac senza incumbensa e schizunt senza lubientscha explicita da las Naziuns unidas, simplamain en virtid dal dretg dal pli ferm, ha'l stgaffi in precedent ed avert la stgacla da Pandora.** Auters stadis pudessan vegnir sin l'idea da duvrar la forza per schogliar conflicts cun pajais limitrofs pli flaiVELS. L'India naziunalista, pussanza nucleara, pudess trair a niz l'impopularitad dals regents da Pachistan per metter fin cun in'attatga a la dispita davart il Caschmir. Anc pli pussaivla è in'acziun russa da l'autra vart dal Caucasus, en Georgia, pia en la direcziun da quel Curdistan iracais autonom che ha stuì metter sias truppas sut il cumond american.

Enturn il Causasus

La Georgia (strusch 5 milliuns olmas) è la patria d'in dals pievels ils pli antics dal mund. Sia famiglia linguistica caucasica n'è parentada cun nagina autra,

dano forsa cun il basc. Manuscripts en linguatg georgian avainsa gia dal tschintgavel secul suenter Cristus, pia tschient onns suenter l'acceptaziun dal cristianissem oriental («ortodox»). Ils Georgians numnan lur pajais «Sacartvelo»; il num europeic «Georgia» deriva forsa «dal cult da s. Gieri, il sontg il pli popular da Georgia» (1), ma forsa era da «Gurdschistan» («pajais dal luf»), il num persan dal pajais. La litteratura georgiana è stada ferm influenzada da la persana e da la greca medievala (Constantinopel). La Russia ha annectà e conquistà ils dus reginams da Georgia a l'entschatta dal 19avel tschientaner; il pievel ha però savi mantegnair sia identitad aifer l'imperi dals zars e lura l'Uniun sovietica. El è puspè independent dapi 1991 e fa part anvidas da la Cuminanza da stadis independents (CSI) dominada da Russia; truppas da la CSI occupan ina sdrima sper il cunfin cun l'Abhasia. La Russia, pussanza nucleara, reproscha dapi onns a la Georgia da lubir a rebels tschetschens da duvrar ina vallada dal Caucasus sco territori da retratga. Pu-

tin pudess sfurzar la Georgia d'acceptar in'occupaziun militarà sut la stgisa da «cumbatter il terrorissem». In'acziun militarà en Georgia colliass la Russia cun sia vasalla l'Armenia e metess en dumonda la construcziun dal conduct d'ielì tranter l'Aserbaigian e la Turchia. Il coc dal problem è la Tschetschenia, nua ch'i dat adina dapli «acziuns da purificaziun» da la soldatesca russa encunter la populaziun. Gist quests dis organischesca Moscva in referendum en Tschetschenia; ma cun ina preschientscha permanenta da 40 000 schuldads «esi gia cler ch'ils Tschetschens na survegnan nagina pussaivladad d'exprimer libramain lur opiniun» (2). Il Caucasus (punct culminant 5633 m), nua ch'ils Russ èn penetrads pir en il 18avel tschientaner, fa part da la mitologia naziunalista russa; Putin giuga gugent cun tals sentiments.

- 1) David Paitschadse en: Uwe Halbach ed Andreas Kappeler (ed.), *Krisenherd Kaukasus. Baden-Baden (Nomos, ISBN 3-7890-3685-4) 1995, p. 55.*
- 2) *Wer hat eine Wahl in Tschetschenien?* en: «*NZZ*», 21 da mars 2003, p. 9.